

গণপ্রজাতন্ত্রী বাংলাদেশ সরকার  
তথ্য অধিদফতর  
বাংলাদেশ সচিবালয়  
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১০৮/২০১৭

ঢাকা, বৃহস্পতিবার ১ জুন ২০১৭, ১৮ জ্যৈষ্ঠ ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। আজ ২০১৭-১৮ অর্থবছরের বাজেট পেশ
- ২। ঘূর্ণিঝড়ে ক্ষতিগ্রস্তদের বাড়িঘর মেরামত করে দেওয়া হবে : সংসদে প্রধানমন্ত্রী
- ৩। আগামী ২০২১ সালের মধ্যে ২৪ হাজার মেগাওয়াট বিদ্যুৎ উৎপাদন : সংসদে প্রধানমন্ত্রী
- ৪। ডিজিটাল পরিচয়পত্র ব্যবহার করে সংসদে প্রবেশ প্রধানমন্ত্রীর
- ৫। অস্ট্রিয়ার ভিয়েনা থেকে দেশে ফিরেছেন প্রধানমন্ত্রী
- ৬। দাদী সায়েরা খাতুনের মৃত্যুবার্ষিকীর মিলাদে যোগ দিলেন প্রধানমন্ত্রী শেখ হাসিনা
- ৭। বিমানবন্দর থেকে সাভার ইপিজেড পর্যন্ত এলিভেটেড এক্সপ্রেসওয়ে হবে  
: সংসদে সড়ক পরিবহন ও সেতুমন্ত্রী
- ৮। চতুর্থ মেডিকেল বিশ্ববিদ্যালয় হচ্ছে সিলেটে : স্বাস্থ্যমন্ত্রী
- ৯। তামাক নিষিদ্ধ করাই শ্রেয় : তথ্যমন্ত্রী
- ১০। কোচিং বাণিজ্যে জড়িতদের শিক্ষকতায় থাকার অধিকার নাই : শিক্ষামন্ত্রী

১। আজ ২০১৭-১৮ অর্থবছরের বাজেট পেশ

আগামী ২০১৭-১৮ অর্থবছরের জন্য ৪ লাখ ২৬৬ কোটি টাকার বাজেট ঘোষণা করতে যাচ্ছে সরকার। এর মধ্যে এক লাখ ২৯ হাজার ১২ কোটি টাকার ঘাটতি ও ২৭ হাজার ৫০০ কোটি টাকার ভর্তুকির প্রস্তাব রেখে আজ জাতীয় সংসদে এগারবারের মতো অর্থমন্ত্রী আবুল মাল আবদুল মুহিত নতুন বাজেট উপস্থাপন করবেন। বাজেটে ভিশন-২০২১ পুরোপুরি বাস্তবায়ন এবং রূপকল্প-২০৪১ এর একটি রোডম্যাপ দেওয়া হবে। এজন্য সবচেয়ে বেশি গুরুত্ব দেয়া হচ্ছে দারিদ্র্য বিমোচন, কর্মসংস্থানের জন্য নতুন বিনিয়োগ আকৃষ্ট করা এবং অবকাঠামো উন্নয়নে। সূত্র-সংবাদ (পৃ. ১, ক. ৪) ইনকিলাব (পৃ. ১, ক. ১) নিউজ টুডে (পৃ. ১ ক. ১) ডেইলি সান (পৃ. ১, ক. ২)।

২। ঘূর্ণিঝড়ে ক্ষতিগ্রস্তদের বাড়িঘর মেরামত করে দেওয়া হবে : সংসদে প্রধানমন্ত্রী

ঘূর্ণিঝড় মোরায় ক্ষতিগ্রস্তদের পুনর্বাসনে সব ধরনের পদক্ষেপ নেওয়ার আশ্বাস দিয়েছেন প্রধানমন্ত্রী শেখ হাসিনা। তিনি বলেছেন, দুর্যোগ ও ত্রাণ মন্ত্রণালয় এবং প্রধানমন্ত্রীর কার্যালয়ের পাশাপাশি রাজনৈতিক দল হিসেবে আওয়ামী লীগের পক্ষ থেকেও ক্ষতিগ্রস্ত মানুষের কল্যাণে প্রয়োজনীয় পদক্ষেপ নেওয়া হবে। ক্ষতিগ্রস্তদের বাড়িঘর মেরামত করে দেওয়া হবে। তিনি বলেন, সরকার দুর্যোগ মোকাবিলায় আগাম প্রস্তুতি ও পদক্ষেপ নেওয়ায় ঘূর্ণিঝড়ে ক্ষয়ক্ষতি কম হয়েছে। গতকাল ৩১ মে বুধবার জাতীয় সংসদ অধিবেশনে প্রধানমন্ত্রীর জন্য নির্ধারিত প্রশ্নোত্তর পর্বে তিনি এসব কথা বলেন। সূত্র-সমকাল (পৃ. ২, ক. ৬), জনকণ্ঠ (পৃ. ১, ক. ৬), নিউজ টুডে (পৃ. ১, ক. ৫), ডেইলি সান (পৃ. ১, ক. ১)।

৩। আগামী ২০২১ সালের মধ্যে ২৪ হাজার মেগাওয়াট বিদ্যুৎ উৎপাদন : সংসদে প্রধানমন্ত্রী

প্রধানমন্ত্রী শেখ হাসিনা বলেছেন, সবার জন্য বিদ্যুৎ সুবিধা নিশ্চিত করার লক্ষ্যে সরকার কাজ করে যাচ্ছে। বর্তমান সরকার যুগোপযোগী বাস্তবসম্মত টেকসই পরিকল্পনা প্রণয়নপূর্বক নতুন বিদ্যুৎ কেন্দ্র নির্মাণ, বেসরকারি খাতে দেশি ও বিদেশি বিনিয়োগ আকৃষ্ট করতে উৎসাহ ও প্রণোদনার ব্যবস্থা গ্রহণ করেছে। এ ছাড়া আঞ্চলিক সহযোগিতার ভিত্তিতে বিদ্যুৎ আমদানির ব্যবস্থাও গ্রহণ করা হয়েছে। আগামী ২০২১ সাল নাগাদ বিদ্যুৎ উৎপাদন ক্ষমতা ২৪ হাজার মেগাওয়াটে উন্নীত করার কার্যক্রম অব্যাহত রয়েছে। গতকাল ৩১ মে বুধবার জাতীয় সংসদে এক প্রশ্নের জবাবে একথা বলেন। বর্তমান সরকার ২০১৪ সালের পর দ্বিতীয় বারের মতো ক্ষমতা গ্রহণের পর থেকে এ পর্যন্ত দেশে ৩৩৩২ মেগাওয়াট বিদ্যুৎ উৎপাদন বৃদ্ধি করেছে। এর মধ্যে ভারতের ত্রিপুরা থেকে ১'শ মেগাওয়াট বিদ্যুৎ আমদানি অন্তর্ভুক্ত রয়েছে। প্রধানমন্ত্রী বলেন, বর্তমানে মোট ১১ হাজার ৩৬৩ মেগাওয়াট ক্ষমতার ৩৪টি বিদ্যুৎকেন্দ্র নির্মাণাধীন রয়েছে। এ বিদ্যুৎকেন্দ্রগুলো ২০১৭ থেকে ২০২১ সালের মধ্যে পর্যায়ক্রমে চালু হবে। সূত্র-ইনকিলাব (পৃ.১,ক.৬)।

৪। ডিজিটাল পরিচয়পত্র ব্যবহার করে সংসদে প্রবেশ প্রধানমন্ত্রীর

সংসদ সদস্য হিসেবে ডিজিটাল পরিচয়পত্র ব্যবহার করে জাতীয় সংসদে হাজিরা দিলেন সংসদ নেতা ও প্রধানমন্ত্রী শেখ হাসিনা। এর আগে তিনি সংসদ সচিবালয় থেকে তাঁর ডিজিটাল পরিচয়পত্র গ্রহণ করেন। অস্ট্রিয়া সফর শেষে গতকাল ৩১ মে বুধবার দেশে ফেরার পর বেলা ১১টায় সংসদ বসার ঠিক আগে অধিবেশনে হাজির হন প্রধানমন্ত্রী। সংসদকক্ষে তাঁর নীল ফিতায় সবুজ রঙের নতুন ওই পরিচয়পত্র ঝুলিয়ে প্রশ্নোত্তর পর্বে অংশ নেন সংসদ নেতা ও প্রধানমন্ত্রী শেখ হাসিনা। সূত্র-জনকণ্ঠ (পৃ.১,ক.৫), সংবাদ (শেষ. পৃ,ক. ৩)।

৫। অস্ট্রিয়ার ভিয়েনা থেকে দেশে ফিরেছেন প্রধানমন্ত্রী

অস্ট্রিয়ার ভিয়েনায় আন্তর্জাতিক আণবিক শক্তি সংস্থার (আইএইএ) দুই দিনের সম্মেলনে যোগদান শেষে গতকাল ৩১ মে বুধবার দেশে ফিরেছেন প্রধানমন্ত্রী শেখ হাসিনা। তাঁকে বহনকারী বিশেষ ফ্লাইট গতকাল ৩১ মে বুধবার ঢাকায় অবতরণ করে। অস্ট্রিয়া সফরকালে প্রধানমন্ত্রী 'আইএইএ'র কারিগরি সহযোগিতা কর্মসূচি : ৬০ বছর পেরিয়ে উন্নয়নে অবদান' শীর্ষক সম্মেলনের উদ্বোধন অনুষ্ঠানে ভাষণ দেন। তিনি অস্ট্রিয়ার চ্যাম্পেলার ক্রিস্টিয়ান কর্ন এবং প্রেসিডেন্ট আলেক্সান্ডার ভ্যানডার বিলেনের সঙ্গে আনুষ্ঠানিক বৈঠকও করেন। সূত্র-প্রথম আলো (পৃ.২,ক.৫)।

৬। দাদী সায়েরা খাতুনের মৃত্যুবার্ষিকীর মিলাদে যোগ দিলেন প্রধানমন্ত্রী শেখ হাসিনা

জাতির পিতা বঙ্গবন্ধু শেখ মুজিবুর রহমানের মা ও প্রধানমন্ত্রী শেখ হাসিনার দাদী সায়েরা খাতুনের ৪২তম মৃত্যুবার্ষিকী উপলক্ষে গতকাল ৩১ মে বুধবার বাদ আছর ধানমন্ডির বঙ্গবন্ধু ভবনে মিলাদ ও দোয়া

=৩=

মাহফিল অনুষ্ঠিত হয়। প্রধানমন্ত্রী শেখ হাসিনা মাহফিলে যোগ দেন। মাহফিলে দাদী মরহুমা সায়েরা খাতুনের আত্মার শান্তি কামনা করে বিশেষ মোনাজাত করা হয়। সূত্র-ইত্তেফাক (পৃ.২,ক.৮), জনকণ্ঠ (শেষ. পৃ. ক. ৩), এশিয়ান এজ (পৃ. ৩, ক. ৫)

৭। বিমানবন্দর থেকে সাভার ইপিজেড পর্যন্ত এলিভেটেড এক্সপ্রেসওয়ে হবে

: সংসদে সড়ক পরিবহন ও সেতুমন্ত্রী

সড়ক পরিবহন ও সেতুমন্ত্রী ওবায়দুল কাদের সংসদকে জানিয়েছেন, গার্মেন্টস শিল্পের সুবিধার্থে ও যোগাযোগ ব্যবস্থার উন্নয়নে রাজধানীর বিমানবন্দর থেকে সাভার ইপিজেড পর্যন্ত এলিভেটেড এক্সপ্রেসওয়ে নির্মাণের পরিকল্পনা নিয়েছে সরকার। চীন সরকারের অর্থায়নে এ বছরের ডিসেম্বরেই গুরুত্বপূর্ণ এই প্রকল্পের কাজ শুরু করা সম্ভব হবে বলে তিনি আশা প্রকাশ করেন। গতকাল ৩১ মে বুধবার সংসদে প্রণোক্তির পর্বে তিনি একথা জানান। সূত্র-ইত্তেফাক (শেষ. পৃ. ক. ৫) ভোরের কাগজ (শেষ. পৃ. ক. ৪) ডেইলি সান (শেষ. পৃ. ক. ১), ডেইলি স্টার (পৃ. ৫, ক. ২)।

৮। চতুর্থ মেডিকেল বিশ্ববিদ্যালয় হচ্ছে সিলেটে : স্বাস্থ্যমন্ত্রী

দেশের চতুর্থ মেডিকেল বিশ্ববিদ্যালয় হতে যাচ্ছে সিলেটে। প্রধানমন্ত্রী শেখ হাসিনা ইতোমধ্যে সিলেট মেডিকেল বিশ্ববিদ্যালয়ের অনুমোদন দিয়েছেন। দক্ষিণ সিলেটের সুরমা নদীর দক্ষিণ পাড়ে সিলেট মেডিকেল বিশ্ববিদ্যালয়ের স্থাপনা নির্মাণ করা হবে। বর্তমানে এটির আইন প্রণয়নের কাজ চলছে। গতকাল ৩১ মে বুধবার সচিবালয়ে অর্থ মন্ত্রণালয়ের সভাকক্ষে অর্থমন্ত্রী আবুল মাল আবদুল মুহিতের উপস্থিতিতে যৌথ প্রেস ব্রিফিংয়ে স্বাস্থ্য ও পরিবার কল্যাণ মন্ত্রী মোহাম্মদ নাসিম এ তথ্য জানিয়ে বলেন, আইন প্রণয়ন শেষ হলে ভিসি নিয়োগ দেয়া হবে। আর সিলেট বিভাগের সকল মেডিকেল কলেজ এই বিশ্ববিদ্যালয়ের অধিভুক্ত হবে। সূত্র-ইত্তেফাক (শেষ. পৃ. ক. ৮), সংবাদ (শেষ. পৃ. ক. ৬) নিউজ টুডে (পৃ. ৩ ক. ২)।

৯। তামাক নিষিদ্ধ করাই শ্রেয় : তথ্যমন্ত্রী

স্পষ্ট উচ্চারণে তামাকের বিরুদ্ধে আবারও তথ্যমন্ত্রী তাঁর অবস্থান তুলে ধরেছেন। তামাক ও তামাকজাত পণ্যকে সুস্থ জীবনের অন্তরায় হিসেবে বর্ণনা করে একে নিষিদ্ধ করাই শ্রেয় বলে মন্তব্য করেছেন তিনি। গতকাল ৩১ মে বুধবার রাজধানীতে জাতীয় জাদুঘরে কবি সুফিয়া কামাল মিলনায়তনে বিশ্ব তামাকমুক্ত দিবস উপলক্ষে মাদকদ্রব্য ও নেশাবিরোধী সংস্থা (মানস) আয়োজিত আলোচনা সভায় প্রধান অতিথির বক্তৃতায় এ কথা বলেন তথ্যমন্ত্রী হাসানুল হক ইনু। সূত্র-যুগান্তর (পৃ.১৭,ক.৫)।

১০। কোচিং বাণিজ্যে জড়িতদের শিক্ষকতায় থাকার অধিকার নাই : শিক্ষামন্ত্রী

শিক্ষার মান উন্নয়নে শিক্ষকদের আরও দায়িত্বশীল ভূমিকা পালনের আহ্বান জানিয়েছেন শিক্ষামন্ত্রী নুরুল ইসলাম নাহিদ। তিনি বলেন, কিছু অসৎ শিক্ষকের কারণে সার্বিকভাবে শিক্ষকদের ভাবমূর্তি ক্ষুণ্ণ হচ্ছে। এরা শ্রেণিকক্ষে পড়ান না। বাড়িতে টাকার বিনিময়ে কোচিং করান। এ বিষয়ে সামাজিক সচেতনতা গড়ে তুলতে হবে। এ মহৎ পেশায় তাদের থাকার কোনো অধিকার নাই। গতকাল ৩১ মে বুধবার মাধ্যমিক ও উচ্চ মাধ্যমিক শিক্ষা বোর্ড ঢাকা আয়োজিত ইফতার মাহফিল অনুষ্ঠানে তিনি এ কথা বলেন। সূত্র-ইনকিলাব (শেষ পৃ.,ক.৫), বাংলাদেশ টুডে (পৃ.২,ক.২), নিউজ টুডে (পৃ.২,ক.৬)।

সম্পাদকীয়

ক. ইত্তেফাক : কিশোর অপরাধীদের সামাজিকভাবে সুস্থ পথে ফিরিয়ে আনতে এবং অন্যান্য অপরাধীদের ক্ষেত্রে আইনকে তার নিজস্ব পথে চলতে দিয়ে দেশে অপহরণ, হত্যার পথ বন্ধ করার আহ্বান।

খ. **জনকণ্ঠ** : দেশে ৫৫% প্রসূতির নিরাপদ মাতৃত্ব নিশ্চিত করা হলেও বাকি ৪৫% এর ক্ষেত্রে মারাত্মক ঝুঁকিতে প্রসূতির এবং শিশুর জীবন বিপন্নের আশংকা থাকে স্বাস্থ্য অধিদফতরের বিভিন্ন তথ্যে তা উঠে এসেছে উল্লেখ করে নিরাপদ মাতৃত্ব নিশ্চিত করতে যথাযথ পদক্ষেপ নেওয়ার ওপর গুরুত্বারোপ।

=৪=

গ. **প্রথম আলো** : পবিত্র রমজান মাসে নিত্যপণ্যের অস্বাভাবিক মূল্যবৃদ্ধিতে সাধারণ মানুষ বিপাকে পড়েছে উল্লেখ করে এ ব্যাপারে তদারকি ও নজরদারি বাড়ানোর সুপারিশ।

ঘ. **ইন্ডিপেনডেন্ট** : অ-প্রাতিষ্ঠানিক শিক্ষা কার্যক্রম জোরদারের মাধ্যমে সমাজ থেকে অশিক্ষা দূর করে সামাজিক সচেতনতা বৃদ্ধির ব্যবস্থা করার আহ্বান।

ঙ. **ডেইলি সান, নিউ এজ** : দেশে তামাক ও তামাকজাত পণ্যের ওপর মাত্রাতিরিক্ত কর আরোপের দ্বারা তামাক সেবন নিরুৎসাহিত করা সহ তামাক চাষের ওপর অধিকহারে কর আরোপের সুপারিশ।

চ. **ডেইলি স্টার** : সরকারের উন্নয়ন কর্মকাণ্ডে মেগা প্রজেক্ট খাতগুলোতে বরাদ্দ দেওয়া অতিরিক্ত অর্থের যথাযথ বন্টন ও ব্যবহারের প্রতি যথাযথ কর্তৃপক্ষকে গুরুত্ব দেওয়ার আহ্বান।

ছ. **নিউ এজ** : গৃহকর্মীদের ওপর শারীরিক ও মানসিক নির্যাতনের ঘটনা প্রতিরোধে গৃহকর্মী সুরক্ষা ও কল্যাণ পলিসি ২০১৫ ও এ সংক্রান্ত হাইকোর্টের নির্দেশনা যথাযথভাবে প্রয়োগে সরকারকে কার্যকর পদক্ষেপ নেওয়ার সুপারিশ।

জ. **নিউ নেশন** : ব্যাংক একাউন্টে ১ লাখ থেকে ১০ লাখ টাকার জমা অর্থের ওপর আবগারি শুল্ক পাঁচশত টাকা থেকে এক হাজার টাকা করে ফেলার সরকারি সিদ্ধান্ত নেওয়ার পূর্বে এ বিষয়ে জনগণের অভিমতকে প্রাধান্য দিয়ে সে অনুযায়ী সিদ্ধান্ত নেওয়ার আহ্বান জানিয়ে সম্পাদকীয় প্রকাশ করেছে।

#### উপ-সম্পাদকীয়

**ইনকিলাব** পত্রিকায় প্রকাশিত কলামে রমজানে ধনী-দরিদ্র নির্বিশেষে সকল মুসলমানদের রোজা পালনের মাধ্যমে ধনীরা দরিদ্রদের ক্ষুধা-পিপাসায় কষ্ট পাওয়ার বেদনা অনুভব করতে পারে বলে উল্লেখ করা হয়েছে।

#### নিবন্ধ ও ফিচার

**ইত্তেফাক** পত্রিকায় প্রকাশিত 'ব্র্যান্ডিং বাংলাদেশ' শিরোনামের নিবন্ধে বাংলাদেশের একটি গ্রহণযোগ্য ব্র্যান্ড ইমেজ তৈরি করতে হলে সরকার, রাজনৈতিক দল, গণমাধ্যম, দেশ এবং প্রবাসের বাসিন্দা সবাইকে একসঙ্গে কাজ করতে হবে বলে অভিমত প্রকাশ করা হয়েছে।

#

ডালিয়া/শুকলা/মরজিনা/সাদ্দা/রশীদ/তানিয়া/২০১৭/৯.০০ ঘণ্টা



